



БҮГІНГІНІҢ БАС ТАҚЫРЫБЫ

ИНФЛЯЦИЯНЫ УЫСТА ҰСТАУ – АРМАН



Үкімет алдағы жылдары инфляцияның нысаналы дәлізін тағы да белгілі деңгейде ұстауға құмбыл болып отыр. Атқарушы биліктің айқындаған межесі бойынша бұл көрсеткіш 2022 жылы 4,0-6,0 пайыз, 2023–2024 жылдары – 4,0-5,0 пайыз, 2025–2026 жылдары 3-4 пайыз шегінде сақталмақ.

Бұл жөнінде өткен аптада Парламент Мәжілісінде 2022–2026 жылдарға арналған Әлеуметтік-экономикалық даму бағдарламасы және 2022–2024 жылдарға арналған кепілдендірілген трансферт туралы заң жобасының таныстырылымында Ұлттық экономика вице-министрі Азамат Әмрин мәлімдеді.

(Соңы 5-бетте)

ҚАЗАҚСТАН
ТӘУЕЛСІЗДІГІНЕ

30 ЖЫЛ



БӘСЕКЕГЕ ҚАБИЛЕТТІЛІКТІҢ
БАСТЫ ФАКТОРЫ –
ЦИФРАНДЫРУ

3-бет



ВИРТУАЛДЫ
ҚАЗА

8-бет

КӨКЕЙКЕСТІ

ҚЫСҚЫ СПОРТҚА ҚЫЗЫҒУШЫЛЫҚ НЕГЕ АЗ?

Шымбұлақ тау шаңғысы курорты – тек Алматының ғана емес, күллі Қазақстанның әлемдік деңгейде танылған ең үздік брендтерінің бірі. Алайда алматылықтардың басым бөлігі мұнда басқа қала, облыстардан қонаққа келген туыс-туған, дос-жаран мен шетелдік меймандарды қыдыртқан кезде ғана келіп жататынын естігенде өзге жұрттар еріксіз бас шайқайды. Бұл бізде әлі күнге дейін туристік мәдениеттің ғана емес, қысқы спорттың да кенжелеп қалғанының нақты көрінісі деуге болады.

Мәселен, «Chimbulak development» ЖШС-нің клиенттік қызмет және сату бойынша менеджері Никита Олейниктің сөзіне қарағанда, әлемнің өзге елдерінде тау шаңғысы курорты бар қалаларда тұрғындардың 60 пайызы демалысын сонда өткізеді. Ал Шымбұлақ тау шаңғысы курортына жүргізілген маркетингтік зерттеулерге қарағанда, қаладан 40-45 минут жерде орналасқанына қарамастан онда алматылықтардың тек 3 пайызы ғана барады екен. Бұған ел тұрғындары арасында «тау шаңғысы курорттары тек сырғанауға арналған. Ал олардың жабдықтары мен арнайы киім-кешегі өте қымбат.

(Соңы 3-бетте)

ТҮЙТКІЛ

БІРЕУДІҢ СЫРҚАТЫ БІРЕУДІҢ НӘПАҚАСЫНА АЙНАЛМАУЫ КЕРЕК

Қайырымдылық ұғымын терең зерттеген ғұлама әл-Фараби: «Адамдары бақытқа жету мақсатымен бір-біріне көмектесіп отыратын қоғам – қайырымды қоғам. Барлық қалалары бақытқа жету мақсатымен бір-біріне көмектесіп отыратын халық – қайырымды халық. Егер халықтар бақытқа жету мақсатымен бір-біріне көмектесіп отырса, бүкіл ғалам қайырымды болмақ», – деген екен. Бірақ соңғы кезде жақсылықтан пайда тауып қалғысы келетіндер қатары көбейді.

Кез келген қоғамда әлеуметтік көмекке мұқтаж адамдар болады. Әсіресе нарық заманында біреу ілгері, біреу кем тұрмыс кешіп жатыр. Мәселен, Біріккен Ұлттар Ұйымының соңғы мәліметі бойынша әлемдегі орын алып жатқан соғыстар мен қақтығыстар салдарынан аш жүрген халықтың

саны соңғы екі жылда 55%-ға артып, 124 млн адамға жеткен. 51 мемлекеттің 124 млн халқы күнделікті аштықпен арпалысады, олардың барлығы кез келген гуманитарлық көмекке мұқтаж. Бұдан басқа қаншама адам материалдық көмекке зәру. Осы жағдайларға байланысты мейірімді жандар –

қауымдастықтар мен ұйымдар түрлі идеялар мен қозғалыстарды, бірлестіктер мен қорларды құруды қолға алды. Олар көмекке мұқтаж жандарға қол ұшын созуды мақсат етті. Нәтижесінде, жеке қайырымдылық жасайтындар, демеушілік пен меценаттық қолдау көрсететіндер және еріктілер қатары көбейді. Сонымен бірге, «қайырымды» алаяқтар да пайда болды.

Қайырымдылық әлеуметтік, экономикалық, тіпті, саяси салаларда да қоғамдық дамудың қозғаушы күші болып табылады. Бірақ елімізде жеке пайда үшін қайырымдылық атын жамылып, «көмекке мұқтажбын» деп елді алдайтындар саны көбейіп барады.

(Соңы 3-бетте)

БАЛАЛАР ҚАЙҒЫСЫНАН ҚАРЖЫ ТАБАТЫНДАРҒА ҚАШАН ТЫЙЫМ САЛЫНАДЫ?

Серікхан ӘДІЛҒАЗЫ, әл-Фараби атындағы ҚазҰУ, заң факультеті, Кеден, қаржы және экологиялық құқық кафедрасының аға оқытушысы, PhD докторы:
– Қазіргі уақытта қолма-қол ақша жинайтын қайырымдылық қорларын бақылау қиын. Заң талабы бойынша кез келген қор қызметкері мен еріктілерде арнайы құжат болу керек. Сондықтан қайырымдылық қаржыны тек қана банк шоты арқылы аударған жөн. Тұрғындар қайырымдылыққа аударған ақшасын бақылауға құқылы. Дегенмен, елімізде қайырымдылықты бақылайтын жүйе мен арнайы мекемелер жоқ. Қазақстан Республикасында қайырымдылық үшін ақша жинау тәртібі 2015 жылғы 16 қарашадағы «Қайырымдылық туралы» заңымен реттелді. Алайда, заңда қайырымдылық жұмыстарын бақылаушы, жүйелеуші мекеме көрсетілмеген. Аталған заңға сәйкес ақша жинауға арнайы қорлар, қоғамдық бірлестіктер, осы салада маманданған, сондай-ақ әділет органдарында ресми тіркелген ұйымдар құқылы болып табылады. Бүгінде елімізде ресми тіркелген 33 қайырымдылық қор жұмыс істейді.

Көшеде көмек сұраған біреуге тиын тастасақ «қайырымдылық» деп есептейміз. Әрине, бұл жай ғана көмек қолын созу. Бірақ сол тиын шынымен қайырымдылыққа жұмсалма ма? Өйткені, елімізде қайырымдылықпен айналысып, өзге балалардың қайғысынан қаржы табатындар көбейді. Ал оларға заң бойынша тосқауыл қойыла ма?

Нұрболат АЙКЕШОВ, әлеуметтанушы:

– Соңғы кездері елімізде қайырымды жандардың жомарттығын пайдаланып, «қайырымдылық» жасап жүргендер жоқ емес, тіпті, көбейіп бара жатыр. Мемлекет елімізді қайырымдылар еліне айналдырып алмаудың алдын алып, көшеде қайырымдылық сұрауға тыйым салған заң шығарып еді, қайырымдылық мәдениетті түрі белең алды. Яғни, ендігі кезде көмек сұраушылар көшеде қол жайып жүрмей, қайырымдылық жәшігін құшақтап немесе сауда орындарына жәшігін қалдырып кететінді шығарды. Олар көбіне мұндай ақша жинауға жас балаларды тартып, адам көп жиналатын жерлерде материалдық көмекке мұқтаж адамның деректері бар мөлдір қорапты көрсету мұқтажына асыруда. Демек, ауру балаға ақша жинау әдісін пайдалана отырып алаяқтар жеңіл табыс табуды мақсат етеді. Мұндай әрекеттің шынайы немесе жалған екенін білу үшін олардан сенім хат пен тиісті құжаттарды талап етуге болады. Егер де орталықтанған жүйе болса, барлығы ашық әрі заңды болады. Мәселен, көмекке мұқтаж адам арнайы тексерулерден кейін деректер қорына тіркеледі.

(Соңы 3-бетте)

